

აფილიაცია - Affiliate - Аффилиация (ლათ. ინგ. affiliate მიერთება)

ადამიანის ერთერთი ძირითადი მოთხოვნილება – საზოგადოებრივი, სოციალური მოთხოვნილება – იმყოფებოდეს ადამიანთა საზოგადოებაში, ჰქონდეს მეგობრული კავშირები და გრძნობითი ურთიერთობა. ა-ის მთავარი მდგენელებია:

- I. დაცულობა-უსაფრთხოების ძირეული ადაპტაციური მოთხოვნილება: სოციალური ადაპტაცია, მარტივად – ვუყვარდე ადამიანებს, ვგრძნობდე ყურადღებას მათი მხრიდან (რათა მშვიდად ვიყო). შესაბამისად, ა ძლიერდება სტრესის, შფოთვის, საკუთარ თავში დაურწმუნებლობის ვითარებაში. ადამიანთა საზოგადოება ეხმარება სუბიექტს, შეამოწმოს მისი ქცევა, რთულ და საშიშ ვითარებაზე საკუთარი რეაგირების ადეკვატურობა. ხშირად სხვა ადამიანებთან სიახლოვე უშუალოდ იწვევს შფოთვის შემცირებას და ამით არბილებს სტრესის თანმდევ ფიზიოლოგიურ და ფსიქოლოგიურ პროცესებს. ხოლო ა-ის აღკვეთა იწვევს მარტოობის, უმწეობის, გაუცხოების განცდას.
- II. ადამიანურ ურთიერთობათა ფუნქციონალური მოთხოვნილება: სოციალური აქტიურობა, მარტივად – მიყვარდეს ადამიანები, ვაგრძნობინო მათ ყურადღება, ვზრუნავდე სხვებზე, ვიცოდე, რომ საზოგადოებისთვის საჭირო ვარ. ამ II მდგენელის არქონა მაჩვენებელია: I მდგენელის მწვავე დაუკმაყოფილებლობისა; ან ნევროზული გადახრისა, რეგრესისა; ან ინფანტილიზმისა. ხშირად ეს მდგენელი თვალთმაქცურად ნიღბავს ანგარებას; ხშირად კი, პირიქით, ქვეცნობიერა [უარყოფითი რაციონალიზაცია].

ინტრაპერსონალურ ტიპს ა სხვებთან შედარებით ნაკლებად აქვს. თუმცა ა-ის არქონა ან მკვეთრი შესუსტება დროებითი ნევროზის ან აუტიზმის მაჩვენებელია.